

Kerwespruch 1985

Ehr liewe Leit!
 Ess ess soweit!
 Därr unn Dick - unn Groß unn Kloa,
 Alles ess heit - uff de Boa!
 Jeder fraat sich - unn ess froh,
 Die Worfeller Kerb ess wirrer do!

Johrzehnte fiel die Kerb - im Schitzechof aus,
 Doch dääs Jahr losse mer - die Wutz eraus!
 Vergeßt eijern Kummer - unn peift uff die Seuje,
 Macht en Richdische druff - bis nooch iwwermeuje!
 Feijert bis ess groh - in de Ecke werd!
 Sie läwe hoch - die Worfeller Kerb!

Woass bei uns unn sunst - so ess bassiert,
 Werd jetzt emol - goanz korz glossiert!

In re Kerweborsch-Versoammlung - gehts moanchemol hoch her,
 Unn doann de Hoamweg noch finne - ess mitunner sauschwer!
 Doch woass bei uns oam bassiert ess - dess packt net jeder,
 Er fuhr vumm Schlabbe bis hoam - zwaahunnertfuffzig Kilemeter!
 Ess iwwer Bischem/Maintal, hoanau unn Fulda kumme,
 Bis er in Worfelle doann - ess Eschbloh hatt gefunne!
 Unn sah se doann endlich - seu Hausnummer vier,
 Fünfanzwoanzig Kilemeter - fer jed' Glos Bier!

In de Dutt war oaner - vumm Bier goanz beglickt,
 Doch uff emm Hoamweg hodds en hinne - bees gedrickt!
 Bis zum HA ELL - hodd er's groad noch geschafft,
 Doch dort war seun Schließmuskel - doann erschlafft.
 Wie seu Geschäft - er hatt vollend,
 Hodd Klo-Papier sogar - er noch verwend.
 Awwer wie hodd er - in seum Suff geflucht,
 Als er die Wasserspielung doann - hodd vergäwens gesucht!

Im Unner- unn Ewverdorf - unn de Kieh-Wald-Treft-Stroß,
Sah mer frijer hegstens - Kieh - unn Geilsfuhrwerke bloß!
Inzwische geht's dort - all-die-weil,
So zu wie eunstmols - uff de Zeil!
Dorch de Wasserlaaf könnt mer - entlaste die Gasse,
Woann dess net geschieht - dess weer koaum so fasse!
Mer fregt sich - muß erst woass bassiern,
Eh die Baddeije - dess kabier'n?!

Stellt Eich vor - ehr macht eijern Kofferroaum uff,
Unn guckt do pletzlich - uff - e Urne druff!
Ehr Leit - woass war die Fraa erschrocke,
Sie war goanz baff - unn vunn de Socke!
Wen hedd der Oblick - net veresse?
E Urn' so wie en Scherm - vergesse!
Ehrn Moann degäje - den konnt des net riehrn,
Er fuhr e paar Doag - schön mit spaziern!

Frijer saße die Junge - unn aa die Alte,
Im Winter uff em Hais-che, im Hof - im Kalte!
Oann de Deer war e Herzche - unn mitunner en Stern,
Mer hodd gewist wo mer heemuß - unn konnt sich net err'n!
Muß en Volle sich heit - gäje de innere Ufftrieb wehrn,
Verwechselt er - goanz leicht - zwaa Deern.
Steht statt im Boad doann - in seum Schroank,
Er konnt noch bremsen - Gott - sei - Doank!

Dreißig Groad kalt - unn er friert net eu,
Jetzt gibts en - winterfeste - Weu!
Woann mer gesundheitlich - aa Schoare nimmt,
Die Hauptsach ess - de Revach stimmt!
Unn schuld war dann - ein Kellermeister,
Doh lache alle - Kellergeister!
Doch de Robert, der ess - goanz gewieft,
Der hodd jed Flasch - uff Frostschutz geprieft!
Vunn seum Weu koann mer trinke - Glas auf Glas,
Unn koaner laaft - beim Doanze - haab!

Die Hinkel peife's - vunn de Dächer,
Die Arweitswut - werdd schwach unn schwächer!
Hadd mer sich emol wirrer - uffgeschwunge,
Unn en Fensterstorz - war groad gelunge.
Wurd ess Schaffe - wirrer oabgeblockt,
Unn's Bauoamt hodd - de Bau gestoppt!
Mer misse mit rechne - unn dess goanz stärk,
Die Ooloag, dess gibt - e Johrhunnert-Werk!

Beim Telefoniern hodd mer sich - schon oft verwehlt,
Doch daß en Musiker uff de falsche - Hochzett speelt,
Unn dem Bestellte klarmacht - ess weer e Versäje,
Dess ess uff de Welt - wohl goanz selten geschäje!

Er fähr nooch Haßloch, baut uff unn legt glei los.
Gejeniwwer in de Wertschaft fregt mer: Wo bleibt er bloß?
Ess Hochzettspaar - juckts in de Fieß,
mit emm Hochzeitsdoanz - do ess ess mies!
Schließlich rift mer oo - bei uns im Ort,
Dort heert mer: Der ess schon loang fort!
Mer macht sich Seuje unn denkt: Ess weer woass bassiert,
Die Bollezen - werdd alarmiert!
Doch die könne seu Auto - aa net finne,
Ess stoand im Hof drin - unn zimmlich hinne!
So koann en Unterhalter - fer Unnerhaltung seuje,
Doch sollt er sich fer die Zukunft emol eubleuje,
Speelt er mol wirrer - in de Fremd irgendwo,
Vorne gefregt - brennt hinne net oo!

Ich heer jetzt mit meum - Gebabbel uff,
Heit mache soamme - meer - oan druff!
Ich doanke Eich noch - all ehr Leit,
Daß ehr heit zu uns - kumme seid!
Doantz - eßt - unn kippt moanch Flasch',
Unn die Musik speelt - de Kerwemarsch!